

道光戊申秋鐫

牧令書

楚興國李煒校刊

牧令書卷九

農桑上目錄

答陳齊永問

許三禮

答仇兆鰲問

許三禮

爲再勸墾荒地嚴禁需索阻撓以安民生事

田文鏡

開墾

王士俊

水利

王士俊

水利

潘杓燦

周禮遂人稻人講義

官獻瑤

五省溝洫圖則說

沈夢蘭

復制府議農田水利書

晏斯盛

飭查江北水利檄

晏斯盛

量行溝洫之利

陳斌

政事

梁章鉅

寄孫雋書

陳宏謀

溝洫事宜示

陳宏謀

飭查水利及時疏濬以備旱潦事

田文鏡

札道府州縣籌辦水利

程含章

與所屬牧令書四

程含章

勸民開溝除潦示

賀長齡

水利

王植

涇渠志後序

王太岳

築堤詳文

馬逢臯

飭興水利牒

李光地

與布撫臺書

李容

井利說

王心敬

開井

黃可潤

下屬縣試行水車檄

喬光烈

涇國之利

黃可潤

牧令書卷九農桑上

安肅徐 棟致初輯

自治原以及取善屏惡皆所以爲民而猶未及乎民及民之政分之有萬端約之祇二事曰教與養而已而養又爲教之本咨十二牧首以食陳三八政統以農此老生常談實經世寶訓也

許三禮

字典三號酉生河南安陽人順治辛丑進士官至副都御史督捕侍郎有政學合一集

答陳齊永問

陳齊永問曰聖門冉求具足民富國之才夫子亦嘗許其藝可從政由今想比及三年可使足民其道果安出先生曰攷之先王九

年有三年之積若三年該有一年之積此古法也再思足民之道無過開其源節其流二者而已然節之權操自上民不能自爲力也如民之惰于農者上勸之勤不能耕且織者上教之耨以紡乘其年豐有餘上多方設法勸之積宜水田者或令之開渠或令之鑿井或令之蓄水宜果木者或令之種桑或令之植果或令之培材宜畜養者或大而馬牛或小而雞豚或又細而池魚以六府言之原不但穀是農事如金木水火土各方所產不同或銅與鐵或竹與梓或漚與酒或陶與冶或鹽與硝何非佐農事之不足者件件精心以治之皆所以開其源也至害農者不一端小民終歲之勤劬不足一事之耗費可念也上爲之薄其稅歛減其徭役息其

誦訟又多約束衙蠹省其剝削抑制豪強免其橫侵消弭盜賊絕其暴掠害農者已去其半若農之自爲耗者亦不一端蓋軍國當多事之日大兵大禮大水大旱恃其平日之積事事撙節冀免凶荒若當成平無事之時奢侈心縱雖小民一念之侈佚可廢中人之產者有之上爲之嚴其禁令除每年供賦及仰事俯畜外有鮮衣怒馬崇宮盛筵者禁之有婚嫁侈費喪葬無度者禁之諸如習于奢侈慶生辰賀字號動輒打網請會戲筵綺席二三十數成羣者禁之或惑于邪教祈平安福造神道祠每至歛錢佈施打醮演戲月每幾舉者禁之如此等害農者又去其半件件留心禁之皆所以節其流也信此開節並至三年行之民足何難蓋求也藝如

不能絕其聚歛道果安出竊意足民之道最要在上之人清心寡慾故能大法小廉絕其橫征暴歛不令其不足乃叫足耳

本末源流具備視其餘言足民之術者皆一枝一派耳

答仇兆鰲問

仇兆鰲問曰先生始蒞海昌見河淺河竭卽通詳開濬水利在在利之第二年卽勸紳耆廣輸社穀年年增焉盡制勞心必求便民亦只爲農事當重循古制而爲之耶先生答曰非也平日講人事挽回造化人力可補天憾小生豎儒不能卽信竊嘗言三代而上之百姓憑君度活三代而後之百姓憑天度活天一有水旱凶荒君有所以救之是民生于君也若君無所以救之必待天之風調

雨順民方有以生活是民生于天也今但以水田社穀二者言之其時之陰陽時若也固享天之生成如遇水旱凶荒之數天至此時亦無如之何矣茲則有水可戽可救田之旱有穀可賑可救田之淹正人事維挽造化之一驗也且必待請蠲于君請賑于上消磨歲月或允或否而民之死亡逃徙已過半矣君至此時亦無如之何矣茲則汲灌自由無詳請之煩取予自便何歲月之耽正人力可補天憾之大可信也如曰遵古制而爲之亦泛然應之已耳奚知此中力救民命善挽天運一段聖學哉

田文鏡

見用人

爲再行勸墾荒地嚴禁需索阻撓以安民生事

照得豫省荒地甚多久蒙 皇恩水田寬以六年旱地寬以十年陞科輸租猶恐民力不繼令地方官資給牛種自應踴躍爭先野無曠土矣乃本部院自布政使任內以及陞授巡撫不惜諄諄勸諭并將已墾成熟未報陞科者免其欺隱之罪題准當年完糧而三年以來不但熟地仍行欺隱而報墾者更復寥寥細加查訪乃知小民不敢墾荒者其弊甚多不得不條分縷析廣爲曉諭嚴禁開列於後

一各州縣荒地無工本者旣不能報開有工本者亦不敢認墾蓋一紙墾詞到官先批鄉保地鄰查覆卽便需索使費甚而坐圖之原差并催糧之里書掌案之經承羣起而爭更有不肖之員

用印一顆尙取其值以致認墾者望而裹足此一弊也嗣後批查勒限秉公據實回覆如果無人古荒四至分明卽給印票准其開墾造冊申報不許需索分毫違則官參吏處

一司府經承橫索冊費尋釁苛駁駁至無可再駁尙不肯代爲詳轉本官不能稽查往往爲此輩所使此費亦必出之墾戶地未墾成而已剝去數層之皮貧民何堪無怪乎視墾荒爲畏途此一弊也嗣後布政司各府直隸州務必刻刻隄防凡有州縣報懇冊結核明如已合式卽刻照轉倘有不符卽令經承將不符之處稟明開具冊結式樣發彼州縣照造如敢仍前苛駁橫索查出官參吏處

一間斷夾荒雖屬無人別人不敢過問而四旁熟地相近人戶又不肯墾希圖日侵月削以廣自己地畝欺隱錢糧此一弊也嗣後如有夾荒地畝卽勒令地隣報墾如抗不具報該地方官卽將此夾荒之地丈出給與情願墾種之人開墾并將四隣熟地丈明如有欺隱卽行詳究追出入官

一頑紳劣衿奸徒惡棍希圖現成霸佔熟地當報墾之時並不聲言及至墾熟卽出而爭執或稱係祖產或稱係買業每乘地方官陞遷事故離任之時預先捏造假契用印收存執爲憑據告爭不已致墾戶畏縮不前此一弊也嗣後如有此等告執者卽將假契追燬立案不行各上司衙門亦不許准理批查倘報墾

之時執契告爭者查出果係祖產買業卽將地畝入官召募墾種仍問以荒廢田糧之罪地方官徇情准理斷價斷贖以長刁風定行從重糾參

一鄰州鄰縣界限不清則臨邊荒地此墾彼告彼墾此告以致無人敢墾此一弊也嗣後各州縣務將交界之處查明立石小民不得侵種犯界如將甲縣之地赴乙縣報墾乙縣之民至甲縣認荒者兩縣會勘明白從重詳究

一地方官私征入己將民間報墾年限已滿熟地并白首成熟地畝概入紅冊征糧並不造報以致紳衿士庶從而效尤每視欺隱爲無罪故往往一縣並無寸荒而除荒之原額尙屬盈千累

百此一弊也嗣後各將欺隱地畝作速詳出姑免其已往之罪若怙終不報一經查出或離任後被別官揭報則死有餘辜斷不輕恕矣

一低窪之處並不講求水利以致大雨淋漓之時四方之水無從宣洩積聚一區良田盡成巨浸此一弊也嗣後務必留心水利或開溝渠或築堤堰相其地土之宜俾雨過卽涸不致久淹則窪地亦可墾也

一異鄉游手游食棍徒並不驅逐或借屯民名色或借墾戶名頭從中阻撓生事將民間已墾熟地報官認墾以致訐訟不休豈敢私下行兇鎗棍交加致成人命此一弊也凡此皆地方官庸

懦無才以致此輩橫行無忌嗣後務必嚴加查拿驅逐飭令土著之民速將荒地開墾使無寸荒爲彼垂涎指認如土著逾期不墾從重究處

以上八條本都院不過舉其大概害切民生者言之其有幅輳寥濶或本都院見聞不及或山城澤國土俗不同惟在賢良郡守州縣於本都院言及者實力奉行於所未言及者明白詳報以便飭行

王士俊

見治原

開墾

三代之時畫井授田無所謂開墾歟然而禮記云無曠土無游民

則春秋以前固重開墾矣孟子云八其疆土地闢則三王之世又嘗聞墾矣至若后稷教民稼穡是開墾於唐虞也神農始作耒耜是開墾於洪荒也蓋觀於開墾一事而王道之根柢具焉雍正元年上諭墾田於百姓最有裨益凡有可耕之處聽民相度機宜自墾自報官不得而勒索吏不得而阻撓水田例以六年起科旱田例以十年起科墾田多者督撫大吏及府州縣官准令議敘皇心懇摯聖諭周詳凡屬秉節綰符之臣豈無何儆秦彭輩仰體朝廷富民阜俗之至意哉余董率牧令詳籌開墾正藉協力其所行大綱凡六曰核極貧之戶曰相材力之宜曰給工本之資曰搜可耕之土曰稽勤惰之法曰察虧折之漸力而行之庶幾奏

富民之效焉

自漢趙過爲搜粟都尉教民用牛耕田之法而民貧不能自辦官爲之營考宋世俵牛遺制每一夫給牛一頭墾田五十畝俟田已成熟遠限五年近限三年悉令還官又以給後之新墾者孳生免其造報嚴察倒斃盜賣諸弊立法頗詳至前明洪武時給天下屯牛共二十五萬五千六百六十四隻仍歲課孳生數目登報然其後法制稍弛至宏治中僅存八萬二千九百四十三隻矣至萬厯中僅存五萬三千四百六十隻矣原額漸歸烏有則稽覈之疎也余現行開墾解俸給牛廣爲設法小村各予一牛大村另酌孳生必報亦趙尙寬輩遺意耳